



## INTRODUCZIUN

DA FLURINA CAVEGN-TOMASCHETT

*Igl evangeli cuntegn ina part dil grond discuors profetic denter Jesus e ses giuvnals. El tematisescha la devastaziun dil tempel da Jerusalem 70 onns suenter Cristus; ina catastrofa schibein religiosa sco era politica. Jesus drova maletgs apocaliptics en fuorma dad enzennas, enconuschents a nus ord la Palentada.*

*Ils maletgs paran buca dad ir a prau cun il plascher che biars sentan all'entschatta digl advent. Plitost stattan els en contrast cun l'idilla da quei temps da preparaziun per Nadal. E tuttina: Ils plaid «Stei sidretg ed alzei vos tgaus, pertgei vies spindrament ei damaneivel» dattan curascha e speranza e gidan a mirar anavon viers igl avegnir. Els animeschan da buca star eri el stgir, mobein sedrizzar viers la glisch divina che vegn encunter a nus.*

## EVANGELI

*Lc 21,25–28.34–36*

<sup>25</sup>Ed ei vegn a dar enzennas vid sulegl, glina e steilas. Sin tiara vegn a reger anguoscha denter ils pievels ed embrugl pervia dil fraccass dalla mar e dallas undas. <sup>26</sup>Ils carstgauns vegnan a snarrir dalla tema en vesta da tut quei che seprepara per il mund; pertgei las forzas dil tschiel vegnan zaccudidas.

<sup>27</sup>E lu vegn ins a veser il Fegl dil carstgaun a vegnend sin ina nebla dil tschiel cun gronda pussonza e maiestad. <sup>28</sup>Cura che quei entscheiva a daventar, stei sidretg ed alzei vos tgaus, pertgei vies spindrament ei damaneivel.

<sup>34</sup>Fagei adatg che vos cors vegnien buc engreviai cun eivradad e stuornadad e cun quitaus terresters, e che gliez di tschaffi buca vus tut anetgamein sco in latsch. <sup>35</sup>El vegn numnadamein sur da tut ils avdents digl entir mund. <sup>36</sup>Vegliei pia ed urei senza calar, per che vus pudeies mitschar da tut quei che daventa e subsister avon il Fegl dil carstgaun.